


欽定八旗通志

兵制志

卷三十七
之三十八



欽定八旗通志卷三十七

兵制志六

入軍令

天命三年

太祖高皇帝興師伐明

諭諸貝勒大臣俘獲之人勿去其衣服勿淫其婦妾勿離

異其匹耦拒戰而死者聽之若歸順者慎勿輕加誅戮

天聰三年

太宗文皇帝諭朕仰承

天命興師伐明拒戰者不得不誅若歸降者雖雞豚毋得
侵擾俘獲之人毋離散其父子夫婦毋淫人婦女毋掠
人衣服毋拆廬舍祠宇毋毀器皿毋伐果木如違令殺
降淫婦女者斬毀廬舍祠宇伐果木掠衣服及離大羣
入村落私掠者鞭一百又毋食明人熟食沽酒聞山海
關內多有鳩毒更宜謹慎以乾糧飼馬或馬匹羸瘦可
量煮豆飼之肥者止秣以草俟休息時再飼以糧凡採

取柴草毋得妄行須聚集衆人以一人爲首有離衆馳
往者拏究如有故違軍令者將不行嚴禁之都統叅領
佐領一併治罪

崇德三年

諭凡和碩親王多羅郡王多羅貝勒固山貝子臨陣交鋒
若七旗王貝勒貝子却走一旗王貝勒貝子拒戰七旗
獲全卽將七旗佐領下人丁給拒戰之一旗若七旗拒
戰一旗却走卽將却走人丁分與七旗若一旗內拒戰

者半却走者半卽以却走人丁分給本旗拒戰者有因
屯劄他所未拒戰而無罪者免革人丁其拒戰之王貝
勒貝子別行給賞若七旗未及整伍一旗王貝勒貝子
拒戰得功者按功次大小俘獲多寡賞之野戰時本旗
大臣率本旗軍下馬立王貝勒貝子等率護軍乘馬立
於後若與敵兵對仗王貝勒貝子大臣不按隊伍輕進
或見敵寡妄自衝突者奪所乘馬匹及俘獲人口凡兩
軍相對必整齊隊伍各按汛地從容前進如擅離本隊

隨別隊行擅離本汛由他汛人及衆軍已進獨却立觀
望者或處死或籍沒或鞭責或革職或罰銀酌量治罪
凡整伍前進稍有先後毋得彼此爭論但以按汛擊敵
不致退縮爲上若有以此爭論者卽爲立心不端之人
如敵人不戰而逃我軍追擊之宜選精兵驍騎合力馳
擊護軍統領不得前進止宜領肅整伍分隊以躡其後
倘遇伏兵或以追躡時遇敵旁出護軍統領乃親擊之
凡大軍起營時各按佐領旗肅整隊而行若有一二人

離隊往來尋索遺物及酗酒者皆貫耳自出城門務遵軍例肅靜行伍毋得喧譁都統副都統叅領護軍統領佐領以次各有統束統束嚴明則該管隊伍豈有喧譁之理今後有喧譁者該管官坐以應得之罪喧譁者責懲軍行時如有一二人離旗行走者許同行人卽報送本都統執送者賞銀三兩下營時凡取薪水務集衆同行妄致失火者斬軍士甲冑均書號記冑兩旁皆用圓鐵葉無甲者衣帽後亦書號記一切軍器自馬絆以上

均書姓名馬必繫牌印烙不印烙者罰銀二兩箭無姓名者罰銀二十兩如得他人箭隱匿不出者亦罰銀二十兩軍行時若見禽獸馳馬追射者兵丁射以飽箭貝子大臣坐以應得之罪夜行時每佐領人等有別吹竹爲號者執治貫耳若不執治議叅領罪盜鞍鞅及轡絡羈絆者按法治罪若馬上行李偏墜應整理者本旗人均站立待整乃行兵入敵境時若有一二人離營私掠被殺者妻子入官仍治本管官罪勿毀寺廟勿妄殺平

人抗者戮之順者養之俘獲之人勿褫其衣服勿離散
人夫婦雖不爲俘獲者亦不許褫衣侵害其俘獲之人
勿令看守馬匹如有一二人妄取糧草被殺者罪與離
伍擒掠者同勿食熟食勿飲酒前此我兵飲食不慎以
不知敵人置毒於中耳今特曉諭宜加謹慎有不遵者
依律治罪

順治八年定發兵之時或在家或在外違限者該
管叅領佐領等官每兵一名罰銀五兩若至革職

等重罪候

旨定奪兵丁不遵約束抗違者酌量罪犯責懲該管官仍
行議處十三年定隨征前鋒護軍領催驍騎廝養
卒等私自逃回初次鞭一百遞發軍前二次正法
康熙十三年題准官員出征在家規避不起身者
革職在外違約者革職提問護軍及領催驍騎等
在家規避不起身者鞭一百仍發軍前在外違約
者鞭一百所獲人口入官若係差遣之處不遵號

欽定八旗通志 卷三十一
令違悞者鞭一百出兵之處不遵號令妄行者爲
首人正法餘各枷三月鞭一百該管官罰俸一年
十八年

聖祖仁皇帝諭領兵諸王將軍等藉捕賊爲名燒民房舍
擄掠子女搶奪財物或分兵所往之處私自擄掠者令
督撫提叅治罪如督撫隱匿事發者督撫革職十九年
題准或攻城或野戰如將陣亡屍骸不能救出者
同戰之叅領散秩官護軍校驍騎校降二級調用

領戰之該營總降一級調用領戰之大員罰俸一
年二十二年議准官兵被傷退回者若係一二等
傷痕免議三等以下傷痕仍與失利者同罪如未
經被傷冒作傷痕退回者照規避例治罪若係官
員重傷止許親隨人等送出無親隨人令驍騎一
二名護送兵丁重傷亦止令驍騎一二名護送多
差者將差撥各官治罪多送之驍騎亦同議處
二十九年

列聖用兵以來戰必勝攻必克所向無敵者皆以賞罰明法律嚴士卒精銳器械堅利人思報國殫心奮勇之所致也今軍行其令各該都統以下察覈軍實凡甲冑弓矢諸軍器務令犀利堅好盛甲均繫號帶並書旗分佐領姓名繫於馬尾其行也視大纛整隊齊發有零星前後亂行及酗酒者該管官立拏懲責其止也各按旗分隊伍分別屯劄有前後錯亂者罪及該管大員馬無印

矢無名各罰以銀給拏獲者竊取鞍轡什物馬匹者視其多寡之數治罪失火從重究懲官兵廝役所過地方無騷擾毋搶掠毋踐踏有擅離營伍入村落山谷奪人財物者軍法從事並罪本主及該管官軍士廝役逃亡在汛界內立行察拏治罪如出汛界外該管大員卽選官兵窮追務獲立斬以徇如不能獲則將往追官兵從重治罪其逃人之主及該管官一併嚴行究懲旣出我境哨探斥埃務期嚴密如曠野列陣交兵王貝勒貝子

公大臣有不按次序攙越前進及見賊兵寡弱不復請令冒昧前進有功不叙仍治以罪其進也須齊列緩繼按隊前行如自離其隊而附人後或自棄其伍而入別行或他人已入而獨留不進者其應斬應籍沒及懲責革罰分別治罪如整旅而進擊敗賊兵厥功維均勿以畧分先後致生爭競至敵兵不戰而潰則選精騎進逐之後隊躡踪而進如遇伏兵或賊兵有旁出者則後隊接戰夫兵者所以討逆而安順也領軍大臣果能嚴束

其下不使良民受害膺上賞違者罰無赦凱旋之日有以兵器私售蒙古者本人治罪並及該管官馬乃大軍急需須視水草佳處小心牧養起行時則留將卒察遺失之馬轡鬃尾所繫字樣交還原主如係疲馬則開明馬匹數目交所在官司人民蒙古善為牧養報知兵部如有隱匿私乘及殺之棄之者治以罪其遺失馬匹之人亦開明馬色報兵部存案恐官兵未能徧知爾部其刊布曉諭之

雍正元年

世宗憲皇帝諭自古用兵之道首以申明號令爲務周易曰師出以律周書曰不愆於六步七步不愆於四伐五伐乃止齊焉可知進退步驟之間尺寸不可違越方爲節制之師必須平日申明號令使三軍之士無不熟知深曉倘其中或有不遵者則按軍律置之於法是其獲罪乃本人之自取無所歸咎雖領兵將帥不能以已意一毫輕重於其間此大公之道也我國家武備精強超

越往古從來軍行之際紀律嚴明信賞必罰是以天戈所指迅奏膚功此中外臣民所共知者今承平日久新進少壯之人未曾親履戎行則於從前規制未必一一諳練若不詳細申明宜諭以致官弁兵丁等或因陷於不知而遽罹罪譴朕心實爲不忍今特令大臣等酌議軍令條約經朕親加覽定凡大端細務莫不備載其中者蓋以軍機關繫至重必使事事合於紀律人人祇奉章程勿犯重罰而妄冀從輕勿因事小而不遵成法將

來荷

天眷佑奏凱言旋凡我弁兵等數十萬人有大功而無小過此則朕心所厚望者也著卽刊刻交與兩路大將軍通行頒布咸使凜遵旋議准凡戰陣之際聽掌號擊鼓鳴金爲進止聞鼓不進聞金不止者斬遇敵進戰有回顧畏縮交頭接額私語者斬專司掌號擊鼓鳴金之人聞令卽掌號擊鼓鳴金令止卽止違者八旗兵鞭責四十綠旗兵鞭責三十臨陣違令者

斬大將軍密傳軍令轉傳之人增減要言者斬大將軍授緊密軍令私告他人以致宣揚誤事者斬官兵殺傷良人冒功者斬掠取他人戰功及詭稱功績以無爲有以輕報重者斬沿途欺壓民番恃強買賣掠財物毀房屋姦婦女者皆斬指稱夢見鬼怪造言惑衆者斬兵丁中途染病該管委署護軍校領催紅旗管隊卽同護軍校驍騎校千總把總一同驗確稟明該管官令醫調治如不驗看醫

治該管委署護軍校領催鞭五十紅旗管隊棍責
四十護軍校驍騎校千總把總插箭如兵丁詐病
偷安者斬大將軍與同官密議軍情有私行竊聽
者斬差往探聽賊人形勢畏縮不往詭稱已去妄
報虛實及探聽不實貽誤軍機者斬獲逸馬隱匿
私乘不給馬主者八旗兵鞭五十綠旗兵棍責四
十仍插箭遊營有獲馬私宰或售與別人者皆斬
臨陣竊馬潛逃者斬傳首示衆如在劄營地方犯

者八旗兵鞭一百綠旗兵棍責八十劄營地方輪
班守卡嚴肅訪察夜遇警急卽密稟申報設備以
俟有驚怖誼譁擾動散走以致亂營者斬私語嗟
怨長噓短嘆者八旗兵鞭七十綠旗兵棍責六十
責後復犯並臨陣時故違者斬黑夜無故驚呼疾
走致亂營伍者斬白晝犯者八旗兵鞭五十綠旗
兵棍責四十面承該管官諭令辭色傲慢者八旗
兵鞭五十綠旗兵棍責四十有意抗違致悞軍機

者斬疎防失火燒燬草廠八旗兵鞭一百綠旗兵棍責八十若臨敵境失火致燒草廠者斬失火致燒衣服器械八旗兵鞭五十綠旗兵棍責四十如在存貯火藥地方失火者八旗兵鞭一百綠旗兵棍責八十該管護軍校驍騎校委署護軍校領催千總把總紅旗管隊皆插箭遊營臨陣時軍營失火致誤大事者兵丁及該管委署護軍校領催紅旗管隊悉斬以徇兵丁夤夜夢魘旁人卽行喚醒

如有隨聲應和擾及營伍者八旗兵鞭七十綠旗兵棍責六十該管委署護軍校領催紅旗管隊插箭遊營臨敵營犯者皆斬管守營門縱人擅入者八旗兵鞭七十綠旗兵棍責六十對敵時犯者斬差往偵探之人遇賊投誠不稟報者八旗兵鞭七十綠旗兵棍責六十如有投誠之人不卽解送以致逃散者八旗兵鞭一百綠旗兵棍責八十因而洩漏軍中虛實者照洩漏軍機例治罪大兵進剿

敗賊後不奉大將軍令擅奪車馬輜重者插箭遊
營因而擾亂營伍者斬倚強欺弱酗酒爲非不遵
約束輕者鞭責重者插箭污穢水泉飲不以次者
八旗兵鞭二百綠旗兵棍責八十支領口糧肆行
拋棄狼籍者八旗兵鞭一百綠旗兵棍責八十該
管委署護軍校領催紅旗管隊等不卽呈報者插
箭兵行不按隊伍踐踏草地者八旗兵鞭一百綠
旗兵棍責八十劄營時牧放馬駝牛羊縱令蹂躪

者八旗兵鞭一百綠旗兵棍責八十仍插箭遊營
該管官插箭兵丁押運軍糧在途私竊升合或竊
同營兵丁口糧及損傷盛米囊橐致多虧折者八
旗兵鞭一百綠旗兵棍責八十弓箭撒袋腰刀皮
索一切軍器不加收管致有遺失並應攜器械擅
自離身八旗兵鞭一百綠旗兵棍責八十該管委
署護軍校領催鞭四十紅旗管隊棍責三十護軍
校驍騎校千總把總等插箭在途見遺失刀箭等

欽定八旗通志 卷三十一
物拾取不稟報給還者八旗兵鞭四十綠旗兵棍
責三十均插箭遊營無緊急事私行馳馬者八旗
兵鞭五十綠旗兵棍責四十追奪馬匹令其步行
兵行各按隊伍以次而前無論道路險夷寬窄有
先後離隊攙越者八旗兵鞭五十綠旗兵棍責四
十均插箭遊營結營之後各帳房出一人見藍旗
則取柴見黑旗則取水有便溺者守門官兵驗明
照牌准其出入起更後不准出營違者八旗兵鞭

四十綠旗兵棍責二十該管委署護軍校領催紅
旗管隊等不嚴行約束者插箭夜傳軍令怠慢不
遵巡察坐堆偷安寢睡誤更曠班者八旗兵鞭一
百綠旗兵棍責八十該管紅旗管隊不察報者八
旗兵鞭五十綠旗兵棍責四十臨陣時犯者斬妄
行動作傲慢官長者插箭遊營各營馬步兵所攜
鎗礮火藥不加謹收貯以致潮濕不能著火及玩
忽拋棄或用藥任意狼籍者八旗兵鞭五十綠旗

兵棍責四十該管紅旗管隊插箭遊營如有遺失
火藥者八旗兵鞭一百綠旗兵棍責八十該管委
署護軍校領催紅旗管隊插箭遊營鉛彈務按鎗
口之大小如式製造如鉛彈不合鎗口係平日演
放八旗兵鞭五十綠旗兵棍責四十皆插箭遊營
該管委署護軍校領催紅旗管隊插箭遊營護軍
校驍騎校千總把總插箭臨陣時兵丁用不合鎗
口之鉛彈施放者斬該管委署護軍校領催鞭一

百紅旗管隊棍責一百護軍校驍騎校千總把總
插箭遊營管總參領參將守備記大過一次馬駝
牲畜不遵照傳檄如法牧養者八旗兵鞭一百綠
旗兵棍責八十該管護軍校驍騎校委署護軍校
領催守備千總把總插箭沿途所遇井泉飲馬之
時以次而前不得爭先擁擠有故意爭奪蹤馬踐
踏污穢泉水者八旗兵鞭一百綠旗兵棍責八十
乾隆十三年

欽定八旗通志 卷三十一
上諭軍旅乃國家第一要務軍法從事定例綦嚴今刑
律內玩寇老師有心貽誤竟無正條非所以重軍務
儆戒失律也夫科場作弊尙卽正典型若以行軍相
較孰爲輕重自應稽察舊案明著刑章俾衆知畏法
方能鼓勇用命此非朕欲用重典實以昭示武臣肅
紀律而勵勇往取辟以止辟之義也見在纂修會典
著軍機大臣會同該部詳酌定議具奏旋議定重臣
膺闔外之寄自當戮力疆場綏寧邊徼至於玩愒偷

安甘心養寇傾險妬功忍心誤國實屬情罪重大
今按中樞政考軍令一篇均爲所屬弁兵約法不
及統兵之人誠於責成專闡申嚴軍紀之意有所
未備嗣後凡統兵將帥玩視軍務苟圖安逸故意
遷延不將實在情形具奏貽誤國事者又凡將帥
因私忿媚嫉推諉牽制以致糜餉老師貽誤軍機
者又凡身爲主帥不能克敵轉布流言搖惑衆心
藉以傾陷他人致誤軍機者均屬有心貽誤應擬

斬立決庶軍律嚴明而身任元戎者亦知儆懼奮勵矣

十四年

諭國家設立營伍領以將弁所以禁暴止姦折衝禦侮責綦重也兵法失律有誅書稱不用命戮於社立法之嚴如此近來法司衙門於官犯相蒙多人緩決因而武弁亦邀寬典大非立法之本意夫軍旅之事國家不能保其百年不用必當申明紀律信賞必罰方

足以振憲綱而作士氣誠使爲將弁者在平時則勤訓練嚴拔補勤巡防以固疆圉設有緩急統帥則詳審機宜熟籌勝算其偏裨士卒則奮勇爭先摧鋒陷陣不避矢石効臂指之使自能克敵制勝若平時不能拊循而流於廢弛或苛急而激爲忿怨偶遇小醜竊發則號令不明指揮不定畏葸退縮縱寇老師或臨陣之時望風委靡甚至欺蔽容隱負恩債事國家所倚以爲干城腹心者何在此而不誅何以示懲乃

使久繫囹圄累歲經年虛擬罪名獲全首領是骫法也後之任事者何由知戒朕以仁治天下慎重民命罔敢勿欽而天討所在朕勿敢赦如訥親張廣泗之誤國負恩屢頒諭旨已立正典刑慶復之欺蒙縱寇亦已賜令自盡而詳閱秋期審冊內除李質粹宋宗璋尙須待質袁士弼情非退縮應該緩決此外如許應虎之失誤軍機臨陣退縮沈瑞龍之私回任所托病偷安胡璘劉種之惟怯退避離汛失守又如張通

楊文富之棄地不守阻回援師皆法之斷不容貸而情之毫無可原者卽其中有先經緩決之犯皆令改擬予勾正法以爲炯戒凡在披堅執銳之徒當思臨陣爭先赴蹈危險死於臨鋒或所不免而國家加恩贈卹廕及子孫如有退縮偷安挫衄失事縱一時苟免終於身伏斧鑕等死耳死敵者榮死法者辱雖至愚亦當審擇而知所處矣若專事姑息積玩成疲於軍務大有關繫訥親張廣泗慶復之敢於貽誤未必

非向來失律倖免人心無所震悚有以啟之也今於
勾到後特頒此諭詳悉開導令武臣咸知僨事者必
無軼罰罹罪者斷難倖生與其伏法於誤事之後不
如捐軀於臨事之時大義昭然將必致身効命以戰
則克以守則固不致苟且偷生陷於顯戮正辟以止
辟之義也此諭著刊刻頒發令內外武職衙門入於
交盤冊內永遠傳示各宜凜遵

四十九年

頒發行軍簡明紀律

諭前因甘省勦捕逆回時綠營官兵於馬家堡打仗因
軍裝火器被雨潮濕俟烘烤完妥再爲前進並有懦
怯退縮者當經降旨通飭各督撫務宜隨時加意整
頓今逆回之事雖完但思整肅營伍固在督撫提鎮
之實心督飭而平時操演講習更在將弁之面爲指
導兵丁之明曉軍律國家累洽重熙承平無事兵可
百年不用不可一日無備與其臨時告誡不若先事

講求著軍機大臣會同該部將行軍紀律擇其緊要
數條務須簡切明當使兵丁人人知曉盡成勁旅以
示朕整飭戎行之至意

一兵丁隨征剿賊俱應奮勇直前其見賊退走者

不過各惜身命心懷畏怯試思臨陣退走律應斬

首示眾若能殺賊立功必蒙陞賞卽或陣亡

國家自有卹典子孫俱得邀恩兵丁等與其臨陣畏

葸難逃

國法何如爭先殺賊奮不顧身但勇往向前未必卽

死一經退後斷不得生此理甚明該管將備等平

時將此諄切告誡務令兵丁等咸知大義臨陣時

自必勇氣百倍可期殺賊立功

一鳥鎗弓箭最為行軍利器若兵丁等臨陣時尙

未見賊遠將鎗箭施放及至交戰火藥箭枝俱已

用完無以禦敵卽同束手待斃關係甚重凡領兵

將備平日務須時加講習令兵丁於臨陣遇賊鎗

定八加通元 卷三十一
箭可及之處不先不後一齊施放庶鎗箭隨聲應
手皆獲實用

一行軍攜帶軍裝火藥俱應在帳房收貯毋令潮
濕卽或途中遇雨亦須嚴密遮護遇賊緩急庶可
用凡帶兵將備等須嚴加曉諭勿致潮濕或需烘
烤以致臨時貽誤至弓箭鎗刀等項平時又須修
整堅利不得廢弛

一臨陣對敵倘遇將領受傷隨從兵丁更當奮勇

直前竭力救護若兵不顧將各惜身命觀望退阻
最爲惡習並應申明軍紀俾衆知悉凡有將領受
傷兵丁不卽時救護竟至潰散脫逃者卽卽查明
按各處斬其能奮勇保護者卽卽議功優賞以示
鼓勵該管將備等平日尤當愛恤士卒臨時賞罰
公平庶兵將同心合力所向無敵

一兵丁對敵乘勝追趕刻不容遲若兵丁等有貪
搶賊人遺棄財物以致賊衆逃遁貽誤不小該將

備等於領兵臨陣時務須通行曉諭違者立即依律治罪庶兵丁等各知儆畏

一營卡最關緊要凡領兵將備等務須嚴飭坐卡兵丁輪班防守留心偵探毋得怠惰偷安卽探察有事只須選派明幹一二人密行飛稟餘仍嚴整坐守毋須輕動無事時不許高聲叫喊致亂營規違者俱照軍法處治

一兵丁遇有調撥自當恪守軍令卽時遵行如敢

騷擾地方欺壓良民蹂躪田禾搶掠財物等事卽應按律從重治罪該管將備等平日加意教誡臨時又當嚴行約束無許違犯

一兵丁奮勇殺賊應予獎賞但恐兵丁等希圖冒功任意朦混不可不預爲防範凡軍法將他人戰功冒爲己功及誑稱實在効力將無作有以輕報重者斬該管將備等應隨時曉諭親自稽查俾立功者得賞冒功者治罪以期核實

一行軍馬駝最宜愛惜凡兵丁等牧放須揀擇水草
草芻臚須按照時候遇有疲乏加意調養夜間尤
宜小心看守偶有失遺須立時尋獲至所挖井泉
不許污穢飲馬各挨次序毋許爭先以致壅塞如
有違犯立即重懲不貸
一劄營後巡邏防守毋得疎懈夜間不許無故行
走帳房內更要小心火燭遇有警報靜聽將令不
得輕舉妄動若逢有密令須各自遵守毋得私相

漏洩該領兵將備等尤宜申明號令隨時曉諭不
得疎懈

欽定八旗通志卷三十七

營制

欽定八旗通志卷三十八

兵制志七

軍政 巡防附

凡軍政五年一舉考察中外武職以定黜陟注上
考者薦舉卓異注下考者糾劾該管官具疏以

聞不入舉劾者以中平注考彙送兵部會都察院兵科

京畿道察覈題覆奉

旨以卓異加一級注冊候陞其以軍政糾劾貪酷革職

提問罷軟不謹革職老病休致才力不及降二級
浮躁降一級皆調用前有卓異應陞及加級紀錄
均不准抵銷

考察八旗武職在京管旗大臣及各省將軍都統
副都統等俱開列事實清冊在京於九月內送部
在外於十月內送部兵部彙齊繕具履歷清單進
呈至在京文員兼旗下武職者仍於京察時聽該部
院衙門考察不在軍政之列鑾儀衛滿洲各官八

旗世職人員俱不行考察此外各衙門所屬武職
各該管官詳核填注考語定以四格曰操守曰才
能曰騎射曰年歲糾以八法曰貪曰酷曰罷軟無
爲曰不謹曰年老曰有疾曰浮躁曰才力不及並
將各該員履歷及有無在軍前行走受傷得功之
處注明分別應去應留造冊送部其堪膺薦舉官
員必須行止端方弓馬嫻熟管轄嚴肅當差勤慎
不擾該屬給餉無虛考語併歷俸已滿三年任內

並無事故並試問

國語方准薦舉屆期兵部將管旗王貝勒等滿洲蒙古都統前鋒統領護軍統領滿洲蒙古副都統滿洲補授漢軍都統副都統兵部滿洲堂官職名開列請

旨派出考察具奏其前鋒營護軍營官員軍政卓異由領侍衛內大臣會同前鋒護軍統領等揀選薦舉至各省駐防官員俱照在京官員之例該將軍都

統副都統等考察河南太原二處駐防官員該巡撫考察其長鄉寶坻固安東安霸州采育里保定府雄縣滄州九處駐防官員二年一次派有護軍統領或副都統前往巡察管轄卽令會同該管官考核具奏內外考選軍政冊限於本年十月具題
乾隆二十四年二月

諭向來內外文武三品以上大員遇京察軍政之年援例自陳文具相沿無裨實政曾經降旨停罷第念伊

等游陟崇階並由特簡其人賢否優劣雖已均在洞鑒然其間亦不乏旅進旅退苟圖持祿戀棧之人若以平時既無大過足干例議又不按例甄核任其迴翔日久必致職業不揚甚非澄敘官聯之道嗣後兵部於軍政時將在京之都統副都統在外之駐防將軍都統副都統各省之提督總兵官分別爲三本繕具簡明履歷清單進呈候朕鑒裁以重考績大典著爲令

是年十月

諭據伊犁圖奏稱本年係應軍政之年將伊犁二城滿洲錫伯官員等照例考試分別定議保題等語向來定例伊犁官員等遇軍政之年保舉卓異後不令特行送京引見者原因伊犁爲極邊地方往來拮据是以停其特送引見但此等卓異人員軍政大典攸關未經引見而將軍大臣等閱看卽爲卓異亦不得合宜嗣後伊犁等處官員遇軍政之年將指爲卓異者

臨時奏聞註冊俟伊等應陞之缺保送引見時將卓異之處一併聲明具奏俟引見之日朕允准後再准其卓異其協領等內指稱為卓異者亦俟伊等年滿送京引見之時一併聲明具奏引見之日朕允准後再准其卓異旋議定駐防旗員視地之大小官之多寡以定額黑龍江薦舉七人

盛京六人吉林察哈爾各五人西安伊犁各四人江寧杭州荊州烏魯木齊各三人綏遠城寧夏廣州

成都熱河密雲各二人山海關涼州青州福州河

南太原巴里坤各一人餘無定額舉非其人者論

如法入於計典官千六法者謂不謹以下六條五品以下

應否引

見由部疏請其應革職官罷任候

旨曾出征効力以老疾休致者審其資格覈其軍功量

予

恩俸有差如有原兼世職及世襲佐領者分別降留

上諭京城兵丁三年一次軍政考驗其優者列頭等賞給銀兩劣者斥革所以示勸懲也獨健銳營外火器營圓明園兵丁未入於考驗嗣後健銳營外火器營圓明園兵丁亦照京城兵丁例著派出軍政之王大臣一體考驗辦理

考察綠營武職鑾儀衛漢冠軍使至整儀尉由本營官注考達部京營千總以上直省營守備以上

以次聽察於其長冊注考語定以四格曰才技曰

年力曰馭兵曰給餉糾以八法

與八旗考察同

京營由步

軍統領覈實達部直省綠營由總督巡撫提督覈實具疏衛所千總由司道注考督撫覈疏薦舉必以才技優長年力强壯馭兵有術給餉無虛又覈其閱俸三年任內並無叅罰迺為合格其因公降罰而廉能過人者除盜案處分外亦准其卓異合格之遊擊以上引

見未滿三年者具奏請

旨已滿三年及都司以下均檄令送部引

見奉

旨准卓異注冊候陞其既膺薦舉後至下次軍政時或因較俸尙未陞用如以考核列入平等者卽將上次薦舉卓異加級注銷入於計典官如曾出征受傷著有勞績除犯貪酷外應革職休致者仍給原品其年老而精力未甚衰憊尙可辦事者或仍留

原任或調補簡缺該督撫提鎮酌量辦理請

旨遵行如果不堪錄用或予守糧一分或令子弟入伍以養餘年又以二年半爲期甄別綠營將備由督撫提鎮各簡其所管副將及守備等官賢能合格者陝甘舉五人直隸江南福建浙江湖廣四川廣東各四人山東山西江西廣西雲南貴州各三人河南二人及應劾之將備均具疏請

旨薦舉者予紀錄糾叅者准入法議處如值軍政之年

停其甄別

三十七年八月

諭旗員補用綠營原以滿洲風俗淳樸技藝優嫻將伊等錄用自能爲綠營表率以挽漢人習氣而外任所得養廉較多伊等所得旣多亦於生計有益此朕教養滿洲奴僕之至意也伊等到任後理應謹守滿洲舊習以技藝爲要多方教導毋染漢人習氣不行糜費守分安常卽至回京時儘可度日乃竟有在外全

忘滿洲舊習竟染漢人習氣凡事尙華不知撙節任意浮糜又甚至買妾置婢彼此效尤若年老無嗣置妾尙可無故爲身體安逸倣效而行此何理乎殊不知朕愛養滿洲奴僕之意著交八旗大臣通行曉諭所管應陞外省之侍衛章京官員等嗣後凡補放綠營人等到任後須謹守滿洲淳樸之舊習操演技藝毋效浮華糜費之惡習以作綠營人等之表率如不知悛改仍有似此者一經查出定行從重治罪著交

各省總督提督巡撫等除嚴行曉諭各員外留心細查如有故違者卽據實叅奏毋得姑息

三十九年十一月

諭據周元理奏查閱營伍情形摺內稱遵化州遊擊佛爾清額墻子路都司福英馬箭均欠純熟勒限半年學習再行考驗所辦非是旗員簡用外任原因緣營弓馬平常令其表率俾有所觀法咸成勁旅該員等自當感激朕恩並加奮勉身先倡率訓練兵丁學習

弓馬方爲無忝委任若徒虛糜廉俸貪逸養安其于滿洲體面盡失尙足爲綠營標準乎今佛爾清額福英馬箭均未純熟致被周元理看出則其生疎不堪可知卽不稱將領之任至綠營勒限半年學習舊例在庸懦漢員偶一引用其知耻者尙當赧顏况滿洲弓馬本所嫻習初用時皆經朕引見發往何以甫至外任卽盡行荒廢轉欲援綠營漢員之例學習稍有入心者尙不知羞惡若此耶昨因直隸副將瑪爾清

阿遊擊武靈阿赴東省協勦賊匪頗能奮勉出力不
愧滿洲勇敢之風當卽加恩陞擢用爲總兵叅將若
佛爾清額福英之弓馬生疎豈可復爲姑息佛爾清
額福英俱著卽解任回京引見再降諭旨嗣後各省
綠營旗員如有弓馬生疎廢弛隊伍者均著照此例
辦理

巡防

凡巡防之制外海巡防

盛京以協領爲總巡佐領防禦驍騎校爲分巡直省

以總兵官爲總巡副將以下爲分巡各于所治界

內率舟師沿海上下更番往來以詰姦禁暴兩界

相交之所屆期會哨同時並聯名申報將軍總督

提督察覈委官稽查若因風汛阻滯或先或後各

以到界之日申報其期約以二四五月爲始至九

月事竣回營其有引避不巡及巡有不周者論如

軍律內河巡防長江白四川巫山而東出三江口

至湖廣界過岳州武昌興國至江西界下九江南
昌至江南界經安慶江寧京口狼山東至于海由
將軍督撫提鎮分委旗標弁兵沿沂江流上下游
巡及交界之處會巡申報互相考覈與外海巡防
同若巡海遭風受傷者在外洋官准軍功加級兵
准一等傷給賞在內洋官准軍功紀錄兵准二等
傷給賞身故者在外洋官兵皆照陣亡之例在內
洋官照陣亡例減一等兵減半各給卹典若在黃

河大江及洞庭洪澤等湖遭風者視外洋賞卹
各處墩臺營房

國初定邊境設立墩臺營房以司偵瞭遇有緊急舉
烟爲號寇至百人者挂席一領放礮一聲至二百
人者挂席二領放礮二聲至五百人者挂席三領
放礮三聲至千人者挂席五領放礮五聲至萬餘
人者挂席七領連放礮聲接遞傳達

康熙七年題准各省孔道均設墩臺營房撥兵看

守如有緊急軍機接遞傳報

乾隆三年奉

旨各省水陸孔道之旁設立墩臺駐宿兵丁所以護衛行人稽查匪類朕聞外省情形種種不一其間兵卒成行器械成列于行李往來之時留心防護者有之防汛至二三人而不成行列器械不整者有之營房雖設而闐其無人一任偷竊潛行漫無知覺者亦有之大抵與督撫提鎮等駐劄大營相近者尙覺整齊

其遠者卽多廢弛夫防汛兵丁旣無差操之勞專司稽察之事而乃怠惰縱逸至此則國家設立汛兵之意安在皆該管官弁約束不嚴董率不力有以致之其如何增設懲警之法令督撫提鎮等轉飭所屬將弁實心奉行俾各勤于執業不似從前之耽逸偷安任意曠誤著兵部定議具奏旋議定各省督撫提鎮將所屬地方詳細籌畫除汛兵已經足額者毋庸再行撥補外其有汛兵缺少之處各按地方衝僻

情形卽行撥補所有器械務須整齊仍令該管官
不時察驗倘有離汛偷安曠誤汛防者將兵丁責
革別補該管官稽察不力者照約束不嚴例議處

欽定八旗通志卷三十八

